

Ni Pangulong  
Dieter F. Uchtdorf  
Ika-duhang Manuglaygay sa  
Unang Panguluhan



# Pangkabilugan nga Komperensya—Indi Isa ka Ordinaryo nga Bugay

**I**sa ka maayo nga miyembro ang nagasugilanon sa isa ka kasilingan nga indi katapo sang aton relihiyon. Sang ang topiko nalab-ot sa pangkabilugan nga komperensya, ang kasilingan nagpamangkot, "Nagasingling ka nga may mga propeta kag mga apostoles kamo? Kag ka-duha sa isa ka tuig sa isa ka bug-os-kalibutan nga komperensya ginapahayag nila ang pulong sang Dios?"

"Huo," sabat sang miyembro nga may kompyansa. Nagpanghunahuna sing makadali ang kasilingan parte sini. Daw matuod-tuod sia nga interesado kag dawayon nagpamangkot, "Ano ang ila ginahandal sa pinakau-lihi nga komperensya?"

Sa sini nga punto ang maayo nga miyembro sang Simbahan halin sa balatyagon sang kakunyag sa pagpabitang sang ebanghelyo nakabatyag sang kahuya. Bisan anhon niya, indi sia makadumdom sang mga detalye sang bisan isa ka pamulong-pulong.

Natublag sini ang iya abyan kag nagsiling, "Nagasingling ka sa akon nga ang Dios nagahambil sa tawo sa aton nga panahon kag indi mo madumduman ang Iya ginahambil?"

Nakabatyag sing kahuya ang tawo sa sini nga pahayag. Nagpangako sia nga panumduanon pa gid niya

sing maayo ang mga pulong nga ginahambil sang mga alagad sang Ginuo sa pangkabilugan nga komperensya.

Tanan kita nakahibalo kon daw ano kabudlay nga panumduanon ang tagsa ka mensahe sa pangkabilugan nga komperensya, kag nagapati ako nga indi naton kinahanglan nga mahuya kon indi naton madumdu-man ang tanan. Apang, may mga mensahe sa tagsa ka pangkabilugan nga komperensya nga ginahatag bilang regalo kag bugay gikan sa langit para gid sa aton personal nga mga sitwasyon sa kabuhi.

Sa paghanda para sa pangkabilugan nga komperensya, tugoti ako nga magpanugyan sang tatlo ka mayor nga mga konsepto nga makabulig sa aton nga mas mahangpan, madumduaman, kag madapat ang mga pulong nga ginasambit sang mga alagad sang Ginuo.

**1. Ang mga miyembro sang Simbahan makabaton sang personal nga bugna samtang nagapamati sila kag nagatuon sang inspirado nga mga pulong nga ginahambil sa pangkabilugan nga komperensya.**

Samtang nagahanda kamo para sa pangkabilugan nga komperensya, ginaagda ko kamo sa pagbinag-binag sang mga pamangkot ninyo nga kinahanglan masabat. Halimbawa, mahimo nga magpangayo kamo sang

direksyon kag giya sang Ginuo parte sa mga hangkat nga inyo ginaatubang.

Ang mga sabat sa inyo [mismo] nga mga pangamuyo mahimo nga maggikan direkta sa isa ka partikular nga pamulong-pulong ukon gikan sa isa ka hambalanon. Sa iban nga tinion ang mga sabat mahimo nga maggikan sa daw wala naangot nga tinaga, hambalanon, ukon kanta. Ang isa ka tagipusuon nga puno sang kapasalamat para sa mga bugay sang kabuhi kag ang isa ka matuod-tuod nga kaluyag sa pagpamati kag pagsunod sang mga laygay magahanda sang dalan para sa personal nga bugna.

## **2. Indi pag-ibale-wala ang isa ka mensahe tungod lamang nga pamilyar na ini.**

Ang mga propeta pirme nagatudlo paagi sa pagsulit-sulit; isa ini ka layi sang pagtuon. Makabati kamo sang pagsulit-sulit sa mga tema kag mga doktrina sa pangkabilugan nga komperensya. Ginapasalig ko kamo: indi ini tungod sa kakulangan sa inspirasyon ukon imahnasyon. Padayon kita nga makabati sang mga mensahe parte sa kaangay nga mga isyu tungod ang Ginuo nagatudlo kag nagapagkit sa aton mga kaisipan kag mga tagipusuon sang pila ka importante nga mga prinsipyo nga may dako nga [wala'y katapusan] nga importansa nga kinahanglan gid mahangpan kag mabuhat antes kita magpadayon sa iban pa nga mga butang. Ang isa ka maalamon nga manugpasad una nga nagapahamtang sang pundasyon antes magpatindog sang mga dingding kag atop.

## **3. Ang mga pulong nga ginahambil sa pangkabilugan nga komperensya dapat mangin kompas nga nagatudlo sang alagyan para sa aton sa masunod nga mga binulan.**

Kon magpamati kita kag magsunod sa mga pagdasig sang Espiritu, magaserbe sila nga Liahona, nga nagagiya sa aton sa wala mahibaloi, makahalangkut nga mga nalupyakan kag mga bukid sa unhan (tan-awa sa 1 Nefi 16).

Halin sa pagsugod sang kalibutan, ang Dios nagtagwag sang mga propeta nga nagahambil sang pagbuot sang langit sa mga katawhan sa ila panahon. Aton responsibilidad ang magpamati kag dayon magdapat sang mga mensahe nga ginahatag sang Ginuo sa aton.

Ang aton maluluy-on kag mapinalanggaon nga Amay nga Langitnon wala nagsikway kag indi magasikway sang Iya mga anak. Sa karon nga panahon, katulad sang mga nagliligad, nagtangdo Sia sang mga apostoles kag mga propeta. Padayon Sia nga nagapahayag sang Iya mga pulong sa ila.

Daw ano katahum nga pribelihiyo ang magpamati sa mga mensahe sang Dios para sa tagsa sa aton sa pangkabilugan nga komperensya! Maghanda kita sing maayo para sa sining dako nga bugay sang diosnon nga giya nga ginahatag sang Iya pinili nga mga alagad.

Tungod indi ini isa ka ordinaryo nga bugay.

---

## **PAGTUDLO GIKAN SA SINING MENSAHE**

- Basaha ang artikulo sing ulolupod. Papagsika ang pamilya sa pagkilala sang mga butang nga pamati sa tion sang pangkabilugan nga komperensya.
- Agud buligan ang magagmay nga kabataan sa pagdapat sang laygay nga ginhatac ni Pangulong Uchtdorf, ipakita sa ila ang isa ka tsart sang mga General Authority (makit-an sa pangkomperensya nga isyu sang *Liahona*). Pahibaloa sila nga ang Unang Panguluhan kag ang Korum sang Napulo'g Duha ka mga Apostoles magahambil sa pangkabilugan nga komperensya. Papagsika ang kabataan nga magpamati sa komperensya kag magdrowing sa isa ka larawan nga makabulig sa ila sa pagpanumdom sang ila natun-an. Ang mga ginikanan sarang maglog-on sa conferencegames.lds.org para sa dugang nga pangkomperensya nga mga kahiwanan para sa kabataan.

## **LAMHARON**

### **Maayo, Mas Maayo, Pinakamaayo**

**Ni Mary-Celeste Lewis**

**S**a iya pamulong-pulong sa pangkabilugan nga komperensya sang Oktubre 2007, si Elder Dallin H. Oaks sang Korum sang Napulo'g Duha ka mga Apostoles naghambil parte sa mga kahiwanan nga "maayo, mas maayo, kag pinakamaayo." Sang maghambil sia parte sa "pagsobra sa mga kahiwanan sang kabataan,"

nakonsensya ako nga naggios-gios sa akon pulungkuan.

Nahibal-an ko nga kadamo na kaayo sang ginabuhat ko. Nagaentra ako sa mga palagwaon sa eskuwelahan, nagakuha sang mabudlay nga mga klase, kag nagaentra man sa iban pa gid nga mga kahiwanan. Indi na ako tayuyon nga makatambong sa mga kahiwanan sang Young Women, kag ang mga Domingo ko napuno sang kakapoy sa pagtinguha nga makatapos sang hilingagawan nga homework. Ang pagpraktis sang musika kag ang pag-edit sang balasanon sang eskuwelahan nadilaan na sing elemento sang kasadya kag nahimo na nga trabaho.

Ang mensahe ni Elder Oaks nagparepaso sa akon sang akon mga buluhaton. Ang akon mga kahiwanan maayo, pero tam-an ini kadamo. Kinahanglan ko pilion ang mga pinakamaayo. Samtang nagatinguha ako nga magdesisyon kon ano nga mga kahiwanan ang untaton, narealisar ko nga ang ebanghelyo ni Jesucristo amo ang pinakamaayo nga prayoridad sang bisan sin-o. Ginbutang ko ang pangamuyo kag pagtuon sang balaan nga mga kasulatan nga pinakauna sa akon listahan, kag halin sadto, ang dalagan sang akon kabuhi nangin mas maayo.

Si Elder Oaks nagtudlo sa akon nga kon *una* naton himuong ang gusto sang Ginuo nga himuong naton, ang tanan maplastar gid sing maayo. Kon tun-an ko ang balaan nga mga kasulatan antes ako maghampang ukon mag-obra sang akon homework, ang tanan nga importante matapos ko gid. Kon ipasad ko ang akon kabuhi sa Ginuo, imbes nga idugang Sia bilang paaman lang, ang akon kabuhi may dugang nga katawhay kag kadalag-an.

Karon mahinalungan gid ako nga nagapamatid sa laygay nga ginahatag sa pangkabilugan nga komperensya!

## MGA KABATAAN

### Makakita Ako sang mga Sabat paagi sa Pangkabilugan nga Komperensya

**S**i Pangulong Uchtdorf nagatudlo nga kon magpanumdom kamo sang pila ka mga pamangkot antes sang pangkabilugan nga komperensya, ang Ginuo sarang magpakighambal sa inyo paagi sa lya mga propeta kag mga apostoles sa tion sang komperensya.

1. Bilang isa ka pamilya ukon klase, hambali kon ano ang kinahanglan ninyo matun-an, [mahimo nga] indibidwal ukon ulolupod. (Halimbawa: Paano ko bala pabakuron ang akon panaksihon? Paano ko atubangon ang isa ka problema sa eskuwelahan?) Sa isa ka panid sang papel ukon sa inyo journal, isulat ang inyo mga pamangkot.
2. Sa mga semana nga nagapadulong sa komperensya, sarang kamo magpanumdom kag magpangamuyo parte sini nga mga pamangkot.
3. Magpamati sing maayo sa tion sang komperensya (sarang makabulig ang pagsulat sang importante nga mga punto). Dayon isulat kon paano sang Ginuo—paagi sa mga lider sang Simbahan—ginsabat ang inyo mga pamangkot.
4. Sa isa pa gid ka panid sang papel, sarang ninyo idrowing ang inyo kaugalingon nga nagahimo sang inyo natun-an.



# Pagpabakod sang mga Pанималай paagi sa Pagdugang sang Pagkaespirituhanon

*Tun-i ining materyal kag, sa nagakaigo, hambali ini upod sang mga sister nga inyo ginabisita. Gamita ang mga pamangkot agud buligan kamo sa pagpabakod sang inyo mga sister kag himuong ang Relief Society nga aktibo nga bahin sang inyo kaugalingon nga kabuhi.*

**S**i Julie B. Beck, pang-kabilugan nga pangulo sang Relief Society, nagsiling: “May nagtubo sa akon [nga] isa ka nagpalanglapaw nga panaksihon sang bili sang mga anak nga babayi sang Dios. . . . Nabatyagan ko nga wala na sing mas labaw pa nga kakinahanglan para sa mas dako nga pagtuo kag personal nga pagkamartrong. Wala na sing mas labaw pa nga kakinahanglan para sa mapag-on nga mga pанималай kag mga puluy-an.”

Ang kauturan nga babayi sarang makabulig sa pagpasad sang mapag-on nga mga puluy-an kag pанималай samtang nagahikot sila suno sa personal nga bugna. “Ang ikasrang sa pagkwalipikar, sa pagbaton, kag paghikot suno sa personal nga bugna amo ang nagaishanon nga pinakaimportante nga ikasrang nga maangkon sa sini nga kabuhi,” padayon ni Sister Beck. “Ang pag-kwalipikar para sa Espiritu sang Ginuo nagasugod sa isa ka kaluyag para sa sinang Espiritu kag nagakinahanglan sang isa ka punto sang katakos. Ang pagtuman sang mga kasuguan, paghinulsol, kag pagbag-o sang mga kasugtanang nga ginhimo sa bonyag nagadala sang bugay sang

pag-angkon pirme sang Espiritu sang Ginuo upod sa aton. Ang paghimo kag pagtipig sang mga kasugtanang sa templo nagadugang man sang espirituhanon nga kusog kag gahum sa kabuhi sang isa ka babayi. Madamo nga mga sabat sa mabudlay nga mga pamangkot ang makit-an paagi sa pagbasa sang balaan nga mga kasulatan tungod ang balaan nga mga kasulatan mga bulig sa bugna. . . . Ang adlaw-adlaw nga pangamuyo importante sa pag-angkon sang Espiritu sang Ginuo upod sa aton.”<sup>1</sup>

Mapabakod man naton ang mga miyembro sang aton pанималай sing espirituhanon samtang ginalugan naton sila nga mahangpan ang wala'y katapusang plano sang Amay nga Langitnon. “Ano ang sarang naton mahimo agud mahanda pa gid ang aton kabataan sing espirituhanon para sa ila wala'y katapusang mga tulumanon?” pamangkot ni Elder M. Russell Ballard sang Korum sang Napulo’g Duha ka mga Apostoles. “Ayhan ang pinakakompleto nga sabat amo ini: Tudlo i sila kon paano ipangabuhi ang mga prinsipyo sang ebanghelyo.” Ini nga pagpanudlo nagaabot paagi sa adlaw-adlaw nga pagpangamuyo,

pagtuon sang balaan nga mga kasulatan, kag ulolupod nga pagkaon sang pamilya subong man sa family home evening tagsa ka semana kag sa pagtambong sa Simbahon. Si Elder Ballard nagpaathag: “Naghanda kita sa tagsa ka adlaw, subong, para sa kabuhi nga wala'y katapusan. Kon wala kita naghanda para sa kabuhi nga wala'y katapusan, nagahanda kita para sa nubo pa dira, ayhan sa mas nubo pa dira.”<sup>2</sup>

## Gikan sa Balaan nga mga Kasulatan

Mga Hulubaton 22:6; 1 Juan 3:22; Doctrine and Covenants 11:13–14; 19:38; 68:25

## Gikan sa Aton Kasaysayan

Ang Propetang Joseph Smith nagtudlo sa kauturan nga babayi sa isa ka miting sang Relief Society sang Abril 1842 nga may seryoso sila nga obligasyon nga himulatan ang ilang kaugalingon nga kaluwasan. Sia naghambal, “Pagkatapos sang [akon] panulin, kamo mangin [may] salabton para sa inyo kaugalingon nga mga sala; isa ka halandumon nga kadungganan nga dapat kamo maglakat sa atubang sang aton Langitnon nga Amay

agud maluwas ang inyo kaugalingon; tanan kita may salabton sa Dios sa kon paano naton ginapauswag ang kasanag kag kaalam nga ginhataq sang aton Ginuo agud masarangan naton nga luwason

ang aton kaugalingon.”<sup>3</sup> Gintud-loan niya sila nga mangin matarong nga mga indibidwal, nga mangin balaan nga katawhan, kag mag-handa para sa mga ordinansa kag kasugtanan sang templo.

#### MGA TANDA

1. Julie B. Beck, “And upon the Handmaids in Those Days Will I Pour Out My Spirit,” *Liahona*, Mayo 2010, 10, 11.
2. M. Russell Ballard, “Spiritual Development,” *Ensign*, Nob. 1978, 65, 66.
3. *Teachings of Presidents of the Church: Joseph Smith [Mga Panudlo sang mga Pangulo sang Simbahang Joseph Smith]* (2007), 355.

#### **Ano ang Sarang Ko Mahimo?**

- 1.** Paano ko mabuligan ang akon mga kauturan nga babayi nga magdugang sa espirituhanon nga pagsalig-sa-kaugalingon?
- 2.** Paano ko mapauswag ang akon kaugalingon nga ikasarang sa pagkilala kag pagsabat sa Balaan nga Espiritu?

Para sa dugang nga impormasyon, mag-log on sa [www.reliefsociety.lds.org](http://www.reliefsociety.lds.org).